

Si tur cos ta cana debidamente manera e ta mustra

SVb ta premira cu na mei ley pa rescata fondo di malesa lo drenta na vigor



ORANJESTAD – Denter di poco lo bin cu e ley cu lo percura cu un saneamento di su debe y recuperacion di e fondo di seguro di malesa administra pa Banco di Seguro Social (SVb). Director di SVb, sr. Edwin Jacobs a declara na Bon Dia Aruba cu e fondo aki tin atencion pa motibo di su situacion financiero.

E reforma di e ley pa atende cu e saneamento di e deficit di e fondo di malesa a keda formula aña pasa. E concepto di ley aki a cuminsa cana su trayecto legal. Recientemente nan a haya e consejo di Raad van Advies ariba e ley pa rescata e fondo di malesa aki. Igualmente sr. Jacobs a bisa cu den proximo dia ta saliendo pa gobierno e comentario di SVb ariba e preguntanan y

remarcanan cu Raad van Advies tabatin, y nan ta spera cu proximamente, gobierno lo entrega e concepto di ley aki na Parlamento. Director di SVb ta premira cu si tur cos cana diligentemente, e ta kere cu eventualmente pa luna di maart e ley aki lo wordo trata den Parlamento.

Si parlamento ta bay di acuerdo cu e cambionan proponi ta wordo premira cu entrante luna di mei e cambionan pa rescata e fondo di malesa lo drenta na vigor. Sr. Jacobs a laga sa cu nan lo mantene comunidad principalmente nan clientenan debidamente informa riba desaroyo riba e tereno aki.

Situacion di fondo di malesa E problema di e fondo aki ta cu añanan prome cu introduccion di AZV e fondo aki tambe tabata cubri e gasto medico di e aseguradonan y e prima no tabata suficiente, y e fondo menciona a keda cu su problema financiero. Pero fondo di AOV si tabatin mas

entrada y SVb a dicidi echa mano di otro fondo pa sostene e fondo di malesa. Esaki a ocasiona cu debi na su gasto halto e fondo a presenta hopi deficit y dor di uza placa di otro fondo, el a crea tambe debe grandi alrededor di 100 miyon florin actualmente.

El a bisa cu aña pasa hunto cu Minister di Salud Publico nan a anuncia na comunidad cu lo bin cu pasonan pa sanea e fondo menciona. Pa tal motibo a keda formula un concepto di ley pa cu esaki, e ta un plan cu ta encera basicamente tres elemento: exoneracion di e debe entre e fondonan. Esaki ta evita un peso adicional riba e doño di trabou cu mester paga extra pa e fondo aki cu tambe ta di e doño di trabou haya mas.

E di dos elemento ta cu debi cu ta exonera e debe entre fondonan, ainda ta keda un debe entre doño di trabou cu SVb tin cu paga placa di absentismo pa causa malesa. Pa atende cu esaki e proposicion

cu tin den e concepto di ley ta pa saca di un solo biahra y pa un solo meta saca alrededor di 6 miyon florin fei di e fondo di cesantia cu ta un fondo financieramente solido y manda e placa aki pa e fondo di seguro di malesa. Sr. Jacobs a laga sa cu fondo di cesantia tambe ta un fondo di doño di trabou y di e forma aki nan ta bay paga e doñonan di trabou cu nan tin debe atrasa cu nan. E di tres elemento tin di haber cu e proposicion ta pa aumenta e salario maximo ariba cual ta cobra prima. Sr. Jacobs a splica cu dor di e aumento ey lo bay tin extra entrada den e fondo y asina e fondo di malesa lo por paga e resto di debe cu tin na doño di trabou. Ademas e lo cuminsa crea reserva pa enfrenta su retonan cu nan ta premira den añanan 2020.

Sr. Jacobs ta considera importante cu ora bo ta trata cu fondo di siguridad social ta: “drecha awe pa enfrenta mañan, y esey ta nos lema”. □